



ITA FÓ SASIN KONA-BA KSOLOK EVANJELLU NIAN

Loron Paskua nian ita selebra Jezús ne'ebé moris-hi'as, maibé "loron" ida ne'e, loron ne'ebé la hotu tanba Jezús moris- hi'as ba nafatin no husu ba ita atu kontinua ninia misaun. Ksolok ne'ebé eskolante sira esperimenta bainhira Jezús mosu ba sira, kontinua iha ita-nia moris no Kristu konvida ita atu sai sasin ksolok nian iha ne'ebé ita hela ba. Ita la'o ho ksolok hodi hanoín katak Jezús la'o nafatin hamutuk ho ita no husu ba ita atu ba nafatin no hasoru sira ne'ebé presiza liu.

IKONE

Ha'u esplika lisaun ba maluk sira hodi tulun sira. Nune'e, ema hotu kontenti, hodi manán mai ha'u maluk sira hotu nia laran di'ak no domin. Sira ne'e hahú mai halimar ho ha'u, rona ha'u nia istoria sira, no mos halo sira nia knaar eskola nian. Ikus mai, sira mai hodi la husu ona tan sa sira mai, hanesan iha Murialdo no Castelnuovo. Ami tau naran ba grupu ida ne'e: "Sosiedade ksolok nian." Naran ne'e di'ak los, basa membru ida-idak iha knaar atu buka livru sira, ko'alia kona ba tema ruma, hala'o jogu ruma ne'ebé halo membru sira seluk haksolok. Ami bandu membru ida-idak atu labele halo buat ruma ne'ebé halo maluk sira laran kraik, liu-liu bainhira ida ne'e hasouru Maromak nia ukunfuan sira. Ne'e duni, ami duni sai kedas husi grupu ne'e membru ne'ebé ko'alia aat Maromak ka ko'alia foer. Ha'u hetan ha'u an iha grupu foin-sa'e lubun ne'e nia ulun. Ami hakotu hamutuk atu tuir ukunfuan sira ne'e:

1. Membru Sosieda Ksolok nian ida-idak sei hadook an husi liafuan, hahalok ne'ebé la tuir sarani di'ak ida nia lisan.
2. Membru ida-idak sei halo di-di'ak no lo-los nia knaar iha eskola no knaar relijiaun nian.

Buat hirak ne'e lori naran di'ak mai ha'u, no iha tinan 1832, maluk sira haree ha'u ho respeitu nu'udar sira nia kapitaun. Husi fatin hotu, ema buka ha'u atu fo ksolok ba sira, tulun alunu sira iha sira nia uma no mos atu hanorin sira iha uma. Ho ida ne'e, Maromak tau osan iha ha'u liman atu sosa buat ne'ebé ha'u presisa hanesan hatais, sasan eskola nian no buat seluk tan. Nune'e ha'u la presisa hatodan ha'u nia familia.



Pergunta atu halo oratorianu sira reflète:

- ⇒ João Bosco, husi situaun ida ne'ebé ladún fasil ba nia, hatene hetan buat di'ak ba nia an no ba maluk sira. Ha'u hatene halo susar no difikuldade sira sai dezafiu atu manán ha'u-nia an rasik, no haka'as an iha virtude sira?
- ⇒ Ukunfuan Sosiedade ksolok nian bele aplika mós ba sira nia moris, maibé keta karik, hodi hanoín ba fatin ida-idak nia situaun no oportunidade, bele aumenta ukunfuan ida tan atu moris nu'udar membru Sosiedade ksolok nian? Hamutuk, nu'udar grupu, koko atu tau ukunfuan 3 hodi aumenta 2 ne'ebé João Bosco hakerek ona.



JOGU



Bainhira Jezús moris hi'as hasoru eskolante sira, sira sente katak sira la bele rai ba sira nia an
ksolok ne'ebé sira hetan iha Jezús nia prezensa. Ita fahe oratorianu sir aba grupu no hili topiku ida (ez:
hadeer molok ba eskola), no sira tenke prepara mimu ida (halo asaun de'it, la bele ko'alia) hodi hatudu
topiku ida ne'e no halo kolega sira seluk hamnasa. Animadór sira bele sai juri hodi fó valór ba sira ne'ebé assiste
mimu nia hamnasa. Grupu ne'ebé halo hamnasa maka'as kolega sira sei manán.

SELEBRASAUN

Iha tempu Paskua nian ita bele hili domingu ida atu halo selebrasaun ida ne'e, kona-ba Emaus, atu oratorianu sira
bele hakle'an signifikadu Paskua nian iha sira-nia moris loron-loron nian.

Materiál ne'ebé presiza: ai-tonka 2, meja ida, hena meja, paun boot ida, lilin 2 no Biblia.

Se selebra iha kapela ida, tau meja iha altár oin no selebrasaun hahú iha liur; se kapela la iha, tau meja iha fatin
sentrál no hahú selebrasaun dook husi meja.

Kantu:

G: Ema na'in rua la'o (hili ema na'in rua ne'ebé kaer aitonka no la'o neineik, sira seluk tuir iha kotuk), sira triste, la
iha esperansa ba sira-nia futuro. Sira hanesan ita bainhira hasoru problema ruma no ita ha hatene atu halo saida.
Sira la'o, ko'alia ba malu, to'o bainhira ema la'o rai ida hakbesik sira. (ita hotu para no ema ida lee Evanjellu)

L: Lk 24,13-26

G: Dala barak ita-nia moris hanesan ne'e: ita la hatene atu ba ne'ebé, ita la hatene husu Jezús nia tulun, maski Nia
la'o hamutuk ho ita. Oras ne'e, ida-idak bele reza ba kolega ruma ka família, ka povu seluk ne'ebé hetan problema
eh susar. Kada orasaun 3 ita hatán: Na'i, tulun sira

Kantu: (ita la'o to'o meja, to'o iha ne'ebá tau hena iha meja no paun ha meja klaran)

L: Lk 24, 28-35 (bainhira ema lee, no dehan katak Jezús lakon, para lai no ema ida lori Biblia iha meja, akompaña ho
lilin 2)

G: "Hela ho ami tanba kalan besik ona". Eskolante husu nune'e ba Jezús, no Nia hela duni hodi silu paun ba sira.
Ohin Jezús kontinua hela ho ita, Ninia Liafuan mak roman ba ita-nia dalan, Eukaristia ne'ebé ita selebra halo ita
simu Ninia Futar Isin, hodi halo Nia presente iha ita-nia fuan no iha ita-nia moris. Ba Ninia prezensa iha ita leet,
ita agradese Nia

Ref: Agradese Na'i Maromak agradese, maluk ehi mai agradese.

1: Na'i, Ita-nia Futar Isin mak paun ne'ebé akompaña ami iha ami-nia dalan, liuliu bainhira ami hetan susar no ami
triste... Ref

2: Na'i, Ita hela ho ami atu rona ami-nia ksolok no ami-nia terus: Ita-nia prezensa haraik esperansa mai ami... Ref

3: Na'i, Ita hakarak han hamutuk ho ami, iha amizade loos hamutuk ho Ita no ami-nia maluk sira, ami sei deskobre
Ita-nia domin... Ref

4: Na'i, Ita presente nafatin iha ami-nia moris loron-loron nian; Ita halo ami sai labarik no foin-sa'e ne'ebé haklaken
Evanjellu ho entusiazmu no ksolok....Ref

G: Oras ne'e, Jezús bolu ita atu repete jestu ne'ebé Nia halo ho eskolante sira: ita sei simu paun baluk ida nu'udar
sinál kona-ba kbiit ne'ebé Maromak haraik mai ita bainhira ita rona Ninia Liafuan no simu Ninia Futar Isin; ho
kbiit ida ne'e ita bele sai evangelizadór ksolok nian ba ita-nia maluk sira.

Kantu: ... (durante knananuk, oratorianu sira hakbesik meja no
irmán/irmaun ka animadór sira fahe paun baluk ida ba sira)

G: Jezús husu mai ita atu ba haklaken Ninia Evanjellu no Ninia
ksolok, ita harohan ba Aman Maromak atu iha buat hotu
ne'ebé ita hala'o ka dehan bele halo Ninia Reinu to'o mai ita.

Ami Aman hananu

